



UPA 2019/220

21.05.2019

Aqqa Samuelson

Angajoqqaat atugarisaannik ilisimasaqarfimmik qitiusumik katersuiffeqalernissaanik pilersitsisoqarnissaanik apeqquteqaat aallaavigalugu oqallisissiatut siunnersuut. Oqallisissiatut siunnersuutip siunertarissavaa angajoqqaat atugarisaanik ilisimasanik katersuiveqalernerup kingunerisaanik Angajoqqaat illersuisuanik pilersitsinissamut tungavissaqalernissaq.

(Inatsisartunut ilaasortaq Jens Napätôk', Partii Naleraq)

Siullermik Inuit Ataqatigiit siunnersuuteqartumut Jens Napätôk-mut siunnersuummullu pingaarutilimmut Inuit Ataqatigiit qujapput.

Angajoqqaarpoq ingerlalluartunik qitornaminnullu isumassuilluartunik. Aamma angajoqqaarpoq inuunerup ingerlanerani ilungersorlutik inuuniartuartunik, qitornaminnullu sapinngisannguartik naapertorlugu isumassuiniartuartunik. Aammali angajoqqaarpoq immikkut pisariaqartitsisunik inuunerullu qanoq atorneqarnissaanut annertuumik kaammattorneqartariaqartunik isumassortariaqartunillu.

Meeqqat inuusuttullu naapertuilluarnermik angajoqqaaminni i isumassorneqarnissaat pingaaruteqarpoq. Meeqqat inuusuttullu atugarisaat pineqartillugit arlalitsigut angajoqqaat ataatsimut isigalugit eqqarsaatigineqarpallaarneq ajorput. Taamaattoqarnera pissutsit pitsaasup tungaanut sakkiartunnginnerannut pissutaaqataasinnaasut ilagisinnaavaat. Angajoqqaat inersimasullu aamma misigissuseqarput, misigissutsitigut tiguisarput sunniisarlutillu, amerlasuullu isumassugassaasarlutik. Taamaattumik meeqqat inuusuttullu immikkut pisariaqartitsisut ilaqutariit akornanni atugarissaarnerulissappata aqqiiviginiarneqassappatalu angajoqqaat ataatsimut peqatigalugit siunissamut siunnerfilimmik iliuusissatut pilersaarusiortariaqalerpugut. Tassuunakkut siunnersuuteqartup toqqammavilersuutigisamini angajoqqaat atugarisaannik ilisimasaqarfimmik qitiusumik katersuiffiliornissamik isuma tapersorsorparput, angajoqqaanut tungasut misilittakkat, suliniutit ilisimatuussutsikkullu toqqammavissat pigineqartariaqarnerat pingaaruteqarmat.

Angajoqqaat atugarisaat pitsanngorsartuassallugit Inatsisartut Naalakkersuisullu pisussaaffeqarput. Ilaqutariit atugarissaartut anguneqassappata ilaqutariinnut politikki aqutigalugu timitalersuineq atuuttariaqarpoq. Naalakkersuisut ilaqutariinnut politikkisamik suliaqarnertik ingerlatsinertillu erseqqissuliornissaat kissaatigaarput, tassami ilaqutariinnut politikki inuiaqatigiinnut pingaarutilerujussuartut inissisimasussaavoq, ilaqutariillu atugarissaarnissaannut sinaakkutaasussaalluni.

INUIT ATAQATIGIIT

Inatsisartuni



Meeqqat inuusuttullu sumiginnagaasernerat akiorniarlugu iliuusissatut pilersaarut Inuit Ataqatigiit saqqummiussimasaat, inatsisartuniillu tamakkiisumik taperserpeqartoq matumani Naalakkersuisut akissuteqaataanni angajoqqaajuneq immikkut samminiarlugu oqariartuutigimmassuk nuannaarutigaarput. Meeqqat inuusuttullu sumiginnagaasernerat iliuusissatut pilersaarusiortfigineqarnissaat pingaarnertut siunertaavoq, taamaattorli angajoqqaat peqataatillugit akuutilluinnarlugillu pilersaarusiortnerit ingerlanneqartussanngormata iluarisimaarlutigu.

Meeqqat inuusuttullu inuunerminni toqqammavissinneqarluarlutik atugarissaarnissaat Inuit Ataqatigiit pingaartippaat. Taamaattumik meeqqat inuusuttullu eqqarsaatigalugit angajoqqaat qitornaminnut isumassuilluarsinnaalernissaat qulakkeerniarlugu iliuseqartoqartariaqarpoq.

Ullutsinni angajoqqaanngujaartartut arlaqartut naammattuugassaapput.

Angajoqqaanngujaartartut amerlanerit inuuniarnermikkut isumassugassaallutillu

aqutissiuutassaasarput. Angajoqqaanngujaartartut amerlasuut ilinniartuupput, akunnattumik isertitaqartuupput, ilaallu angajoqqaaminnik isumalluuteqarluatik inuusarlutik.

Angajoqqaanngujaartartut isumassorneqarnerat aqutissiuunneqarnerannullu ullumikkut siunissamilu pitsaanerisumik atugassaqartitsilernissarput anguniartuartariaqarpoq.

Angajoqqaanngujaarluatik ilinniariartartut ullutsinni arlallit ajuusaarnartumik qitornaqarnertik pissutigiiinnarlugu ilinniarnerminnik taamaatitsiinnartartut takussaapput.

Angajoqqaanngujaartartut ilinniarnerannut tunngatillugu isumassorneqarnerat, sullinneqarnerat, ilinniarnermilu aporfiiit pillugit isumassorneqarnissamut aqutissiuunneqarnissamullu pisariaqartitsisarnerat eqqumaffigisariaqarpoq. Tamattami ilinniartortatsinnut pitsaanerpaamik atugassaqartitsinissarput kissaatigaarput, aamma ilinniartut angajoqqaajuppata qitornaqaraluarpatalu tamanut atugassarititaasut pitsaasuujarnissaat qulakkeerusukkatsigu.

Siunnersuuteqartup toqqammavilersuutigisamini Angajoqqaat illersuisuannik pilersitsinissamik pilersitsinissamik tunngavissaqalernissaq ujartorpa. Tunngaviusumik innarluutillit meeqqallu pisinnaatitaaffeqarnerat illersuisoqarnerilu Naalagaaffiit Peqatigiit aalajangersagaannut aallaaveqarput. Taakkualu pisinnaatitaaffiit naalagaaffiit peqatigiit immikkut isiginiagassatut isigalugit suliarisaraat.

Angajoqqaanut Nuna tamakkerlugu isumassuisartussanik pilersitsisoqarnissaanut isuma saatsinneqarsinnaanersoq Inuit Ataqatigiinniit eqqarsaatissiissutigerusupparput. Tassami angajoqqaanut Nuna tamakkerlugu isumassuisartussanik pilersitsinikkut, angajoqqaat isumassorluarneqarnerulersinnaanerat qanimullu orninneqarluatik tikinneqarluatillu isumassuisarnerup aqutissiuussisarnerullu nukittorsarneqarsinnaanera

INUIT ATAQATIGIIT

Inatsisartuni



qulakkeerneqarsinnaammat. Nuna tamakkerlugu angajoqqaat isumassorneqarnerat sumiiffinni tamani atuuttariaqarpoq, illoqarfinniuppat nunaqarfinniuppallu.

Angajoqqaat atugarisaannik ilisimasaqarfimmik qitiusumik katersuiffeqalernissaanut siunertaqarneq Inuit Ataqatigiit tapersorsorpaat, isumaqaratta angajoqqaat isumassorneqarluassappata misilittakkat, ilisimasat sullisseriaatsillu ataqatigiissaarneqartariaqarmata. Tassuunakkut angajoqqaat atugarisaannik ilisimasaqarfik qitiusumik katersuiffeqalersinnerisigut suliniutit angajoqqaanut tunngasut ersarinnerulersinnaallutillu ilisimatuussutsikkut toqqammavissaqalersinnaapput.

Taamatut oqaaseqarluta oqallisissiami partiit Naalakkersuisullu oqallilluarnissaannik kissaappavut.